



**“UPRAVLJANJE RIZIKOM U PRIVATNOJ SIGURNOSTI“,
JASMIN AHIĆ I IVAN NAĐ – PRIKAZ KNJIGE**

Prikaz knjige

Primljeno/Received:

Prihvaćeno/Accepted:

**“RISK MANAGEMENT IN PRIVATE SECURITY“, JASMIN AHIĆ AND IVAN
NAĐ - BOOK REVIEW**

Book review

Hana UGLJANIN

Knjiga „Upravljanje rizikom u privatnoj sigurnosti“ autora prof. dr. Jasmina Ahića i doc. dr. Ivana Nađa, u izdanju Fakulteta za kriminalistiku, kriminologiju i sigurnosne studije Univerziteta u Sarajevu, je djelo koje je već samom promocijom održanom 11. januara 2018. godine u Svečanoj sali Doma policije u Sarajevu privukla ogromnu pažnju naučne i stručne javnosti. Naime, riječ je o djelu koje je bilo prijeko potrebno bosanskohercegovačkim, ali i regionalnim naučnim krugovima, s obzirom na evidentan nedostatak literature koja pokriva djelokrug rada privatne sigurnosti. Privatna sigurnost je relativno mlada grana u Bosni i Hercegovini, ali i veoma značajna, te u tom kontekstu ova knjiga ima ogroman doprinos. Autori su temeljito, sistematski, pregledno i jasno obradili veoma zahtjevnu i nedovoljno istraženu temu, te time zadovoljili navedene potrebe i nadmašili već visoko postavljena očekivanja. Iako u predgovoru knjige autori ističu da je riječ o djelu koje je namijenjeno studentima s ciljem sticanja znanja iz područja privatne sigurnosti, sa sigurnošću možemo reći da je njegova primjena daleko šira. „Upravljanje rizikom u privatnoj sigurnosti“ je naučno utemeljeno, stručno relevantno i savremeno djelo usmjereno stručnoj i naučnoj javnosti, ali i dovoljno jasno, pregledno i razumljivo široj čitateljskoj publici. Posljednjih godina primjetan je porast interesovanja i sve veći broj osoba koje se na određeni način bave pojedinim segmentima privatne sigurnosti, ali je veoma malo stručnjaka koji mogu napraviti kvalitetnu procjenu rizika, te se značaj i korist ove knjige može posmatrati i sa tog aspekta.

Problematicu upravljanja rizikom u privatnoj sigurnosti, u već prepoznatljivom stilu pisanja i korištenjem relevantne naučne i stručne literature, autori izlažu na 147 stranica. Pažljivo pripremljena materija je strukturirana u deset zasebnih poglavlja: „*Pojmovno definiranje sigurnosti*“, „*Sistem privatne sigurnosti*“, „*Privatna sigurnost kao rezultat stanja opće sigurnosti*“, „*Osnove o riziku*“, „*Parametri rizika*“, „*Upravljanje rizicima prema ISO 31000*“, „*Metodologija analize rizika*“, „*Upravljanje projektnim rizicima prema PMBOK GUIDE*“, „*Poredba pristupa upravljanju projektnim rizicima*“ i „*Uloge i odgovornosti unutar procesa upravljanja projektnim rizicima*“.

Nakon predgovora i uvoda, knjiga započinje poglavljem kojim se definira pojam sigurnosti, a zatim sistem sigurnosti, privatna sigurnost i sistem privatne sigurnosti. U ovom dijelu, autori se također bave i pojmom javnog i privatnog sektora obrađujući sljedeće tematike: „*Konceptualizacija javnog i privatnog sektora*“, „*Konceptualizacija javnog i privatnog prostora*“, „*Priroda prostora*“ i „*Urbani prostor i nadzor – porast masovnog privatnog vlasništva*“. Drugo poglavlje rezervirano je isključivo za sistem privatne sigurnosti i to kroz njegovo terminološko i teorijsko određenje. „*Privatna sigurnost kao rezultat stanja opće sigurnosti*“ je iduće poglavlje koje se bavi definiranjem sustava osiguranja osoba, imovine i poslovanja, te u tom kontekstu razrađuje metodologiju procjene sigurnosti i to kroz četiri etape: pripremanje projekta, prikupljanje podataka, obrada podataka i donošenje zaključaka sa prijedlogom protumjera zaštite. Osim toga, u ovom poglavlju se iznose i postupci izrade projekta zaštite osoba, objekata ili prostora, politika sigurnosti poduzeća, te sigurnost poslovnih objekata.

Kroz poglavlja koja slijede autori se na sistematičan način bave problematikom rizika, počev od pojma i definicije rizika, mehanizama njegove pojave, pa do određivanja parametara rizika u koje autori svrstavaju: prijetnju, ranjivost objekata, posljedice i vjerovatnoću događaja. Nakon jasno izloženih osnova i polazišta za kvalitetnu procjenu i upravljanje rizicima, autori se u naredna tri poglavlja sveobuhvatno bave tematikom upravljanja rizicima prema ISO 31000, metodologijom analize rizika, te upravljanjem projektnim rizicima prema PMBOK GUIDE. „*Upravljanje rizicima prema ISO 31000*“ je poglavlje koje čitatelju nudi uvid u principe, okvir i proces upravljanja rizicima, alate i tehnike za procjenu rizika, načine tretiranja rizika, te implementaciju upravljanja rizicima prema ISO 31000. „*Metodologija analize rizika*“ predstavljena je kroz kvalitativnu i kvantitativnu analizu i to prezentovanjem glavnih osobina obje metode i davanjem praktičnih uputa kada i kako koristiti neku od njih. „*Upravljanje projektnim rizicima prema PMBOK GUIDE*“ je poglavlje koje analizira Vodič za upravljanje projektima, engl. A Guide to the Project Management Body of Knowledge (PMBOK® Guide) i ukazuje na njegovu praktičnu primjenu prilikom upravljanja projektnim rizicima.

U dijelu pod nazivom „*Poredba pristupa upravljanju projektnim rizicima*“ izložena je komparativna analiza pojedinih razvijenih pristupa upravljanju rizicima, počev od standarda, pa do opisnih metodoloških pristupa. Posljednje poglavlje pojašnjava uloge i odgovornosti unutar procesa upravljanja projektnim rizicima podijeljene između sponzora i rukovodioca projekta, menadžera za rizike, vlasnika rizika i vlasnika aktivnosti, članova projektnog tima i ostalih zainteresiranih strana.

Važno je istaći da je cjelokupno djelo prožeto tabelarnim i grafičkim prikazima koji uveliko doprinose potpunom razumijevanju materije. Osim toga, na kraju svakog poglavlja nalaze se pripremljena pitanja za provjeru znanja koja pomažu studentima u izučavanju ovog područja i koja dodatno doprinose edukativnoj dimenziji ovog djela.

Knjiga završava riječima recenzenata, prof. dr. Nedžada Korajlića i dr. sci. Armina Kržalića. Prof. dr. Nedžad Korajlić, između ostalog, navodi „*Knjiga „Upravljanje rizikom u privatnoj sigurnosti“ je rezultat timskog rada Ahića i Nađa i njihovog karakterističnog izraza i pisanja, te bogatog iskustva autora. Ovo djelo je originalno sa više stajališta, te predstavlja vrijedno štivo ne samo naučnicima, istraživačima i studentima, već svim praktičarima u sistemu privatne sigurnosti*“.

„Tekst knjige je razumljiv, dobro sistematiziran i zbog toga preporučujem sadržaj ovog djela za upotrebu u domaćoj nastavi na visokoškolskim ustanovama koje izučavaju programe sigurnosnih studija i kriminalistike. Dugogodišnje iskustvo u sigurnosnom sektoru, autore je svrstalo u dobre poznavaoce predmetne materije, kako na domaćem tako i na međunarodnom planu“, zaključuje dr. sci. Armin Kržalić.

Podaci o autoru

Hana Ugljanin, magistar prava i magistar kriminalistike, zaposlena kao mlađi inspektor – istražitelj u Federalnoj upravi policije Federalnog ministarstva unutrašnjih poslova. Trenutno student III ciklusa studija Fakulteta za kriminalistiku, kriminologiju i sigurnosne studije Univerziteta u Sarajevu.

E-mail: hanaugljanin@fkn.unsa.ba